



Mariane Paviasen, Ataatsimiititaliami siulittaasoq
Inuussutissarsiornermut Aatsitassanullu Ataatsimiititaliaq

UKA2022/97-imut atatillugu apeqqutininut akissutit

Asasara Marianne Paviassen

Naalakkersuisut sinnerlugit UKA2022/97-imut atatillugu
Inuussutissarsiornermut Ataatsitassanullu Ataatsimiititaliaq sinnerlugu
apeqqutigisatit qujassutigaaqka.

16-03-2023
Suliap normua 2023 -
4679

P. O. box 1601
3900 Nuuk
Tel. (+299) 34 50 00
E-mail: isiin@nanoq.gl
www.naalakkersuisut.gl

Apeqqutit uani issuarneqartarput ataanilu akissuteqarfingeqarlutik.

- 1. Naalakkersuisoq akissuteqaammini allappoq imatut “Maannamit Naalakkersuisut sapigaqartuusut atugaat eqqaamasassaavaat, nunanut allanut niueqateqartarneq nioqqutissanillu eqqussuinerup annertusarnerani. Naalakkersuisunut nassuiaqqunekarpoq suliniutit tigussaasut suut Naalakkersuisut iliuuseriniarneraat qularnaarumallugu innuttaasunut sapigaqartuusunut periarfissat qinerneqarsinnaalersikkumallugit, sapigaqartuusunullu nioqqutissat akikinnerusut periarfissaalersikkumallugit?**

Akissut:

Nioqqutissiat immikkut ittut qaffasinnerusunik akeqartarmata sapigaqartut atugaannik Naalakkersuisut paasillunniarput, inuiaqatigiinni nioqqutissat akiisa Ukrainemi sorsunnerup aamma Coronamik nappaalanersuup kingunerisaanik qaffakkiartornerannik tunngaveqartumik qaffakkiartupilloormata, tamanna Inatsisartunut akissuteqaammi Naalakkersuisut oqaatigaat. Royal Arctic Linep assartuinermi akigititaasa qaffakkiartornissaat illuatungilerumallugu Naalakkersuisut 2022-imi Ikiorsiissutinik aqqissuussineq atortuulersippaat, aamma nunaqarfinnut isorliunerusunullu ukiuunerani nioqqutissanik pilersuineranut tunngasoq. Soorluttaaq akissuteqaammi aamma oqaatigineqartoq inuussutissarsiortunut atugassarititaasut pitsaanerpaajunissaat Naalakkersuisut kissaatigaat, taamaattumillu ingerlaqqittumik nunanik allanik niueqateqarnerup annertusarneqarnissaa sulissutigalugu, tamanna nammineq nioqqutissanik amerlanerusunik qinigassaqarnissamut aqutissiuussissammat.

Tamanna aamma sapigaqartunut allanullu nioqqutissat eqqarsaatigalugit nioqqutissanik assigiinngitsumik amerlanerusunik qinigassaqaarnissaanut atuuppoq.

Tassaniipput suliniutit aalajangersimasut maanna sulissutigineqartut.

Joint Committeemi suleqatigiinneq USA-p nunattalu akornanni ingerlanneqartoq aqputigalugu USA-p nunatta akornanni niueqatigiinnitta annertusarneqaarnissaanut periarfissat misissuiffigineqarput.

Tamatumalu saniatigut Tului Nunaata niueqatigiinnikkut isumaqatigiissuteqarfiginissaa Naalakkersuisut suli ulapputigaat.

Nioqqutissanik amerlanerusunik neqerooruteqarsinnaalernerup nioqqutissat ilaasa akimikkut appasinnerulernerannik kinguneqarsinnaasumik unammillerneq annerusoq pilersissinaavaa. Taamaattumik suliniutit aalajangersimasut tigussaasullu, soorlu niueqatigiinnissamut isumaqatigiissuteqarnerit niueqatigiinnerulernerumik kinguneqartarput, nunaniit arlaqartuniit nioqqutissanik amerlanerusunik periarfissaqalernerup pisiassat assigiinngitsut amerlanerulersillugillu kingunerisinnaavaat akikinnerulersinnaanerit. Tamanna aamma innuttaasunut sapigaqartunut atatillugu aammalu isorliunerusuni najugaqartunut atatillugu atuuppoq.

2. Naalakkersuisut paasinninnerat naapertorlugu aporfissat qanoq ittut nassaassaappat akornutaasutut sapigaqartunut inuussutissanik piuminarnerusumik eqqussuisoqarsinnaaneranut?

Akissut:

Naalakkersuisut isumaqanngillat immikkuullarissunik sapigaqartunut inuussutissanik nunatsinnut ajornannginnerusumik eqqussuisinnaanermut inatsisitigut akornutaasunik aporfissaqartoq. Piffissami atuuttumi aporfissatut pinngortartut tassaasarput Ukrainemi sorsunnerup aammalu nappaassuup Covidip sunniutigisaanik nioqqutissanut nassiussuinermilu akit qaffakkiartorneri. Aporfissat taakkua Naalakkersuisut eqqumaffigivaat, taamaattumillu akit qaffakkiartornerisa kinguneri artukkiutaaqqunagit Naalakkersuisut niueqatigisinnaasanut arlaqarnerusunut niuernikkut isumaqatigiissutissanik isumaqatigiinniuteqarnikkut niuernikkut attaveqarfinnik aqputinillu ineriartortitsineq sulissutigaat.

3. Attaveqaasersuutitut atatillugu aporfissat qanoq ittut Naalakkersuisut isumaat naapertorlugu piuppat akornutaasut sapigaqartunut inuussutissanik nunatsinnut eqqussuisinnaanermut?

Akissut:

Attaveqaasersuutini aporfissat aalajangersimasut, soorlu assartuinermi akiusut qaffasippallaarneri killilersuisuusut aporfiusartullu nioqputissanik nunatsinnut eqqussuinermit Naalakkersuisut isumaqarput, tamatumani aamma inuussutissanik sapigalinnut iluaqutaasartunik. Nunatta nammineq iluani assartuinermit suliaqartut suliffeqarfiit akigititaat qaffakkiartortut aporfiusarput, nunatsinnut nioqputissanik ataatsimut isigisumik eqqussuinermi akiusut qaffasereersut eqqussuinerup killilerneqartarneranut aporfionerisa saniatigut. Nioqputissanik assigiinngitsunik amerlanerusunik neqeroorutissaqalersinnaaqulluta nunanik allanik niueqateqarnitta annertusarneqarnissaa Naalakkersuisut sulissutigivaat, tamanna nunatsinni innuttaasunut minnerunngitsumillu inunnut sapigaqartunut iluaqutaassammat. USA-mi nioqputissat ulluinnarsiutaasut amerlasuut akikitsut nassaassaammata neqeroorutaasullu assigiinngiiaartut assut amerlallutik USA-p nunattalu akornanni niuernikkut periarfissat annertunerulersinnaanerit periarfissarsiuunneqarpoq. Tamatumunngalu atatillugu naalagaaffiit ilaat Maine sumiiffia tunngavigalugu maanna Island aqputigalugu Kalaallit Nunaannut aquteqareermat isaavittut aallaavigissallugu pingaaruteqarpoq.

4. Naalakkersuisut qanoq ittunik tunngavilersuuteqarpat aalajangiiffigisassatut siunnersuutip itigartitsissutigineqarnissaanut?**Akissut:**

Naalakkersuisut aalajangiiffigisassatut siunnersuummik itigartitsissuteqarneranut tunngaviuvoq suliniutinik aallartitsisoqareenera nunanillu allanik niueqateqarnerup annertusarneqarnissaa pillugit isumaqatigiinniarnernik ingerlatsisoqareenera. Taamaattumillu siunissamut isigisumik amerlanerusunik qinigassaqalernissamik akikinnerusunillu nioqputeqalernissamik kinguneqarsinnaasunik nunanik allanik niueqateqarnerup annertunerulernissaanik Naalakkersuisut nukitik atussammatigit.

5. Naalakkersuisut allanik suliamut attuumassuteqartunik ilassutissarpaat?**Akissut:**

Apeqqutit pineqartut nunatsinni innuttaasunut amerlasuunut attuumassuteqarmata soqutigineqarlunilu malersorneqarnerat pillugu Naalakkersuisut Inuussutissarsionermit Aatsitassanullu Ataatsimiititaliaq qutsavigaat. Nunatsinni sapigaqartut ajorluartumik amerlasuutigut ajornartorsionartumik inissisimasarput, assersuutigalugulu pilersuinermit

ajornartorsiutit kingunerisaannik sapigalinnut naleqquttunik nioqqutissanik naammattunik pisiassaqaanngikkaangat.

Naalakkersuisut niuertarfiit nunatsinni ulluinnarsiutinik nioqquteqartartut inerititaqarfiusumik suleqatigisarpaat. Naalakkersuisut isumaqarput nunatsinni niuertarfiit ulluinnarsiutinik nioqquteqartut annertuutigut sullitami pisiniartartut pisariaqartitaannik naammassinninniartartut, tamatumanilu aamma innuttaasut sapigallit eqqarsaatigalugit. Naalakkersuisut periarfissat siulliit atorlugit ulluinnarsiutinik niuertarfiit sapigalinnut nioqqutissanik neqeroorutissaqarnerat pillugu ulluinnarsiutinik niuerfiusartunut oqaloqatiginnissutigissavaat, minnerunngitsumik nunaqarfinni.

Inussiarnersumik inuulluaqqusillunga



Vivian Motzfeldt